

motus, *Gen. l. 14*; sed de tempore interno, seu ipsâ duratione rerum intrinsecâ, quæ mensurabilis est & successiva, dum res fluxu quodam continuo, juxta mensuram temporis externi, progrediuntur. Atque sic quidem dubio caret, tempus successivum quid esse, eine Ordnung dessen, was auf einander folget, quod Aristotelici per numerum motûs exprimere solent; attamen non est hæc descriptio temporis adæquata, siquidem non exprimit id omne, per quod illud ab omni duratione quocunque modo infinitâ distinguitur. Ad hoc enim etiam requiriatur, ut tempus sit duratio & initium & finem habens. Constat, homines omnes, factâ mortuorum resurrectione, & extremo judicio peracto, alios in beatitudine cœlesti, alios in infernali damnatione sine fine superstites fore. Nec quispiam, reor, dubitaverit, eorum durationem intrinsecè successivam esse, quandoquidem essentia eorum finita tamen est manetque, sola essentia infinitâ omnem omnino successionem intrinsecam excludente. At Scriptura hanc durationem creaturarum, rationalium, post Seculi hujus consummationem, non tempus vocat, sed æternitatem, non absolute, siquidem, eandem initium habere, certissimum est; sed secundum quid & respectu finis, qui ei defuturus est. Quid? quod, tempus aliquando penitus desitum esse, *Apoc. X, 6.* dicatur, & noctes (consequenter & dies, quarum in vicissitudinibus omne tempus consistit,) amplius non futuras, *Apoc. XXI, 25. XXII, 5.* Nam externa illa temporis mensura desinet, *2. Pet. III, 7. 10. II. 12.* ergò nec mensuratum, tempus, erit: quia relata sunt simul naturâ, ut sublatto uno, alterum quoque tollatur. Ecce sic durationem successivam, quæ tamen tempus non est: ex quo clarum, ad tempus definiendum non sufficere successionem seu ordinem succedentium antecedentis & consequentis, sed ulterius ad illud requiri, ut finem habere possit, si ab æternitate à parte post, ut scholasticè loqui liceat, ipsum sit distinguendum. Ex opposito igitur tempus etiam notare debet durationem rerum initium habentem, cum alijs ab æternitate absolute dictâ & à parte ante di-